

Акафист Воскресению Христову



Кондак 1.

Возбранный Воеводо и Господи, вечныя смёрти победителю, яко избавлься от духовнаго умерщвления, похвальная восписую Ти, возсозданный Тобою, раб Твой. Ты же, яко имеяй победу над смёртию, от смёрти греховныя свободи нас, зовущих:

Иисусе воскресший, воскреси души наша.

Ўкос 1.

Ангели воскресение Твое, Христе Спасе, непрестанно поют на небесех, и нас на земли сподоби чистым сердцем воспети Тебе сице:

Иисусе непостижимый, всех верных просвещаяй, просвети и мя заблудшаго.

Иисусе воскресший, всех Собою оживляяй, оживи мя умершаго грехми.

Иисусе, на небо вознесыйся и возносяй на Тя надеющихся, совознеси и мя долу преклоннаго.

Иисусе, седяй одесную Отца и разделяяй славу с любящими Тя, не лишй мя славы Твоея.

Иисусе, хотяй прийти судити живым и мертвым, не осуди мя по делом моим, но сотвори со мною по милости Твоей.

Иисусе воскресший, воскреси души наша.

Кондак 2.

Видя падших человеков, Господи, Ты вочеловечився совоскресил еси всех и, воскресив, даровал вся потребная ко спасению: сице и мене умерщвленнаго грехми оживи, зовуща: Аллилуия.

Икос 2.

Разум не постигает тайны Божественныя, како Источник жизни воскресает, умерщвляя смерть? Сего ради, точно сердцем испытующе радость воскресения и тою просвещаемы, со гласом веселия духовнаго взываем Ти сице:

Иисусе, входяй дверем заключенным, вниди в дом души моея.

Иисусе, сретивый ученики на пути, срящи и мя на пути сей жизни.

Иисусе, воспламенивый сердца их Твоими словесы, воспламени и мое хладное сердце.

Иисусе, давший Себе познати в преломлении хлеба, даждь ми познати Тя в Божественней Евхаристии.

Иисусе, обещаый Духа Святаго учеником Твоим, ниспосли и мне Сего Духа Утешителя от Отца.

Иисусе воскресший, воскреси души наша.

Кондак 3.

Силою Божественною воскресивый Лазаря, воскреси и мене ислéвшаго страстьми и многолетно лежащаго во гробе нераскаяния, да возстав по гласу Твоему, воспою спасаемый: Аллилуия.

Икос 3.

Имеяй власть над смертию, из ада души возвал еси, Иисусе. Воззови и мене из глубины греховныя, да и аз, очистив чувства, блистающе Ти во свете неприступнем, радостно воспою победную песнь тако:

Иисусе, смёрти победителю, победи моя злыя страсти.

Иисусе, жизни подателю, даждь ми жизнь спасительную.

Иисусе, источнике радости, возвесели сердце мое во истине Твоей.

Иисусе, пятию хлебы пять тысяч насытивый, хлебом небесным напитай мя.

Иисусе, надеждо падших, изми мя из рова зол моих.

Иисусе воскресший, воскрес души наша.

Кондак 4.

Буря страстей смущает и потопляет мя, но молю Тя Иисусе, яко Петру, простри ми руку помощи и, силою воскресения Твоего воздвигнув мя, научи воспевати: Аллилуия.

Икос 4.

Слышаще радостную весть воскресения Твоего, Иисусе, небеса достойно веселятся, земля же радуется; и мы празднующе вечное веселие, дерзаем взывати Тебе сице:

Иисусе, седая во свете неприступнем, буди доступен всем по милосердию Твоему.

Иисусе, любяй создания Твоя, не забуди и мене последнего.

Иисусе, влекий к Себе сердца, смягчи и мое окаянное сердце.

Иисусе, вся благая прошения исполняяй, исполни и мое прошение, во еже паче всего любить Тя.

Иисусе, всяку каплю слезную приемляй, не отрини и моих молений.

Иисусе воскресший, воскрес души наша.

Кондак 5.

Богоприятная жизнь источается от Тебе, о Иисусе Сыне Бога живаго! Сего ради молю Тя, да не погубит мя человекоубийца и да не заградит уста моя, вопиющая Тебе: Аллилуия.

Икос 5.

Видевше духом воскресшаго Господа, приидите, пиво пием новое, не от камене истекшее, но от источника нетленного и живоноснаго гроба Спасителя, имже бесплодную землю душ наших оодждив, научи всех пети Ему сице:

Иисусе, напаяяй нас Своею Кровию, даруй мне неоскудно приимати пречестную Кровь сию.

Иисусе, ниспосылаяй дождь на праведных и грешных, ороси и мя к плодоношению духовному.

Иисусе, не возгнушавыйся грешницы покаившаяся, даждь и мне нозе Твои омьти слезами благодарения.

Иисусе, рекий Фоме: «блажени не видевшии, но веровавшии», даждь ми веру нелицемерную.

Иисусе, рекий: «ищите и обрящете», даруй ми обрести Тя единого на потребу.

Иисусе воскресший, воскреси души наша.

Кондак 6.

Проповедуяй в душе немолкающего радования Твое живоносное воскресение, Иисусе Боже мой, да буду и аз грешный причастник сего воскресения, поя Тебе непрестанно в горнем Иерусалиме: Аллилуия.

Икос 6.

Возсиявый всему миру воскресением Своим Господь Иисус Христос, ныне вся исполняет света, небо же и землю и преисподняя; да празднует убо вся тварь Христова востание, в немже утверждаеми вопием сице:

Иисусе, вся исполняяй светом Твоим, просвети и мои омраченныя очи.

Иисусе, небо и землю сочетавый, возведи мя от земли на небо.

Иисусе, низшедый светом Божества в преисподняя, сниди в преисподнюю души моя.

Иисусе, изведый из темниц адовых ожидавшия Тя души, изведи и мя грешного из мрака уныния, яко живот мой аду приближися.

Иисусе, всем простираяй пречистей руке Твои, обьими и мя окаяннаго.

Иисусе воскресший, воскреси души наша.

Кондак 7.

Хотяй открыти силу Божества Своего, Господь покрывается печатию Каиафы, да не нарушив оныя пред стрегущими, победоносно встанет и научит пети: Аллилуия.

Икос 7.

Дивно и непостижно есть, како вчера спогребыйся Тебе, Христе, днесь совостаю духом, Тебе воскресшему, и воспеваю тако:

Иисусе воскресший, всем туне жизнь подаваяй, окрили ум мой, да Тебе последствует.

Иисусе, освятивый землю Твоими стопами, освяти мысль мою, к Тебе возносящуюся.

Иисусе, не возбраняемый начертати пречистый образ Твой, даждь и мне имети вину в души моей образ Твоего воскресения.

Иисусе, приявший две лепте вдовицы, прими от мене песнь сию.

Иисусе, не осудивый блудницы, но на путь истины наставивый ю, не осуди и моих нечистых уст, в песнопении Тя лобызающих.

Иисусе воскресший, воскреси души наша.

Кондак 8.

Странно Бога вочеловечшася и воскресша мисленно видяще, всякое житейское отложим попечение, яко да Царя всех подыдем и воспоём Ему: Аллилуия.

Икос 8.

Весь был еси любовь к падшим человеком, о Иисусе, и поставил еси на божественной стражи богоглаголиваго Аввакума, да покажет светоносна ангела, ясно глаголюща о воскресении Твоем. Темже и мы зовем Тебе сие:

Иисусе, стрегомый воинами, послѣ паки ангела хранителя на стражу души моея, егоже аз отгоняю грехи моими.

Иисусе, ослепивый очи стрегущим Тя блистанием Божества, отврати очи мои от суеты и просвети к познанию истины.

Иисусе, вопрошавый апостола Петра, «любиши ли Мя?», даждь мне имети образ любви его.

Иисусе, простивый тому апостолу отречение, прости и мне ежечасныя отречения от повелений Твоих.

Иисусе, давший власть вязати и решити, разреши мя от неправд моих.

Иисусе воскресший, воскреси души наша.

Кондак 9.

Все естество человеческое Тобою воспрियाемое прославися воскресением Твоим, Иисусе, и сего ради даруеши телесем нетление. Темже мы, видяще сие знамение в останцах святых, вопием со умилением: Аллилуия.

Икос 9.

Ветии богоглаголивии утренюют духом, сретая Тя исходяща из гроба, и вместо мира приносят Ти песнь яко Солнцу правды и Владыце, с ними же наша молитвы прими сицевыя:

Иисусе, приемый мир на Тя изливанное, прими и мною изливанная славословия.

Иисусе, Солнце истины, просвети душу мою.

Иисусе, рыбари соделавый ловцы человек, улови и мою злую волю в Твое послушание.

Иисусе, из Савла соделавый первоверховнаго апостола, вразуми и мя заблуждающаго.

Иисусе, молитвами апостола сего и всех святых Твоих, пощади мя грешнаго.

Иисусе воскресший, воскреси души наша.

Кондак 10.

Спасти хотяи род человеческий Иисусе, снизшел еси на землю и Бог сый восприял еси немощи наша, да и в них явится сила Твоя, подвижающая пети: Аллилуия.

Икос 10.

Царю воскресший, Иисусе Христе, Спасителю наш! Ты, снизшедый в преисподняя земли и сокрушивый верей вечныя, содержащая связанныя души, свободи и мене от уз греха, взывающа Тебе сие:

Иисусе, вручивый возлюбленнаго ученика Матери Твоей, вручи и мя спасительному Ея смотрению.

Иисусе, страдания Матере Твоея обративый в радость, даждь и мне окаянному терпеливо понести крест мой.

Иисусе, давший миру заступницу Матерь Твою, даждь и мне грешному быти под кровом Ея.

Иисусе, младенцем невозбраный прикасатися к Тебе, даруй мне их незлобие.

Иисусе, рекии блуднице: «иди, и отседе не согрешай», даждь ми ктому не прогневлати Тя.

Иисусе воскресший, воскреси души наша.

Кондак 11.

Пение умиленное о воскресении Твоем даруй мне принести Тебе, о Спасителю мой! И в нем да примет душа моя елей исцеления от душевредных мечтаний, и да поет выну Тебе: Аллилуия.

Икос 11.

Светопреемно от воскресения Твоего восприявше лучи благодати, и чрез них яко в зеркале видяще духовно Твое живоносное востание, покланаемся Кресту Твоему Честному, и Святое Воскресение Твое поем и славим сие:

Иисусе, преклонивый небеса, прими поклонение наше благоутробно.

Иисусе, уснувший плотию яко мертв, умертви наша плотския похоти.

Иисусе, всего Себе давший на спасение человеков, даждь и мне всецело предатися Тебе.

Иисусе, возшедый на небеса уготовати место любящим Тя, всели и мя во обители Твоя.

Иисусе, седый одесную Отца, десным овцам сопричти мя.

Иисусе воскресший, воскреси души наша.

Кондак 12.

Благодать даждь и мне, всех возлюбивый Иисусе, и прими мое моление яко дань приносимую Тебе, и отжени от души моея вся лукавая помышления, да неосужденно воспою Тебе: Аллилуия.

Икос 12.

Поюще Твое всеславное воскресение, величаем Тя, о Иисусе Христе Боже наш! И веруем, яко даруеши всем живот вечный. Того ради в сей нареченный и святой день, яко братья друг друга обьемем, ненавидящим нас простим вся воскресением, и едиными усты и едином сердцем возопиим Тебе тако:

Иисусе, благословляяй благословляющия Тя, благослови и ныне посильный труд мой.

Иисусе, освящаяй на Тя уповающия, освяти желания и намерения моя.

Иисусе, обещающий быти с верными до скончания века, пребуди неотлучно и со мною грешным.

Иисусе, Слово Ипостаси Отчей, очисти недостойное мое слово к Твоему песнопению.

Иисусе, [Пасха](#) спасительная, от смерти к жизни приводящая, всели мя в чертог Твой, просветив одеяние души моея.

Иисусе воскресший, воскреси души наша.

Кондак 13.

О, Иисусе Христе, смертию смерть поправый и сущим во гробех живот даровавый! Приими в воню благоухания духовнаго сие малое моление наше и сущим нам во гробех нерадения даруй живот вечный, да поем Тебе. Аллилуия.

Этот кондак читается трижды, затем икос 1-й и кондак 1-й.

Молитва ко Господу Иисусу воскресшему.

Слава Тебе, Господи Иисусе Христе, Боже мой, яко паки сподобил мя еси недостойнаго, прешедши поприще святого поста, поклонитися Божественным Страстам Твоим и видети всерадостный день преславнаго из гроба Воскресения Твоего, в оньже свободил еси сущия во аде от век связанныя души праведных. Тоя Божественныя свободы духа и

плоти, дражайший Спасителю мой, и аз желаю, да разрешиши мя, связана суща многими грехи, и да сотвориши возсияти живонóсному свету Воскресения Твоего во мрачней души моей. Вижду бо безчисленныя щедроты и неизреченное человеколюбие Твое, яко не то́чию от небытия в бытие мя привел еси, и образа Твоего подобием украсив, всея до́льней тв́ари владыку поставил мя еси, но и посем падша с высоты и врагу порабóтившася, не оставил еси, но, искупив мя безценною Кровию Твоею, благодатию крещения снабдил мя еси, да востеку на первое достояние. Аз же, окаянный, запят быв умом плотским, обратихся вспять и паки раб сотворихся греха и страстей, донележе един по единому погубих все дары благодати Твоея. И ныне убо, что сотворю, не вем; обаче помянув глаголы пречистых уст Твоих, яко не пришел еси призвати праведники, но грешники в покаяние, и аз, яко един от сих, с верою и смирением прихожду к живонóсному грóбу Твоему, не ароматы и воню мира носяй, (наг бо есмь и пуст благих дел,) но па́че надежду имый обрести в нем прощение грехам моим и обновление нечистому житию моему. Призри убо на мя, кающася и служити Тебе хотяща, и не отрини от благодати Воскресения Твоего! Живонóсною смérтию Твоею и погребением умертви моя лю́тыя страсти, да, яко мертв и погребен, живу в мире сем. Пресла́вным востанием Твоим воздвигни мою ду́шу, умерщвленную грехми, и оживи совесть, еяже ничтоже в мире ну́жнейши е́сть. Вознесением Твоим отторгни мя от суетных и душетленных благ земных, и сотвори мя горняя му́дрствовати, яко да не ктому себе живя и угождая, но Тебе, Господу и Богу моему, служа и работая, якоже сподобихся поклониться Воскресению Твоему на земли, тако сподоблен буду видети Тебе, дражайшаго Искупителя моего, и на небеси, за приятие смérти крестныя славою и че́стию венчанна, и став одесную величества Твоего, со архангелы и ангелы, и со всеми искупленными Тобою братьями моими, во веки веков пою Тебе: Аллилу́ия! Ами́нь.

* * *

Источник: Акафист Воскресению Христову / составил барон Нольде. - Изд. 6-е. - Москва: Синодальная тип., 1889. - 31 с.